

### Ca The Yowes

#### Chorus

*Ca'the yowes to the knowes,  
Ca' them where the heather grows,  
Ca' them where the burnie rowes,  
My bonie Dearie.*

Hark the mavis' e'ening sang,  
Sounding Clouden's woods  
amang;  
Then a-faulding let us gang,  
My bonnie Dearie.  
*Ca' the yowes, &c.*

We'll gae down by Clouden side,  
Thro' the hazels, spreading wide,  
O'er the waves that sweetly glide,  
To the moon sae clearly.  
Yonder Clouden's silent towers,  
Where, at moonshine's midnight  
hours,  
O'er the dewy-bending flowers,  
Fairies dance sae cheery.  
*Ca' the yowes, &c.*

Ghaist nor bogle shalt thou fear,  
Thou'rt to Love and Heav'n sae  
dear,  
Nocht of ill may come thee near;  
My bonie Dearie.  
Fair and lovely as thou art,  
Thou hast stown my very heart;  
I can die-but canna part,  
My bonie Dearie.  
*Ca' the yowes, &c.*

### Duncan Gray

Duncan Gray cam here tae woo,  
Ha! Ha! The wooin o't!  
On blythe yule nicht when we were fu  
Ha! Ha! The wooin o't!  
Maggie coost her heid fu high  
Looked asklent an unco skeigh,  
Gart puir Duncan stand abeigh  
Ha! Ha! The wooin o't!

Duncan fleech't an Duncan prayed  
Ha! Ha! The wooin o't!  
Meg was deif as Ailsa Craig  
Ha! Ha! The wooin o't!  
Duncan sighed baith oot an in  
Grat his een baith bleart an blin  
Spak o lowpin ower a lin  
Ha! Ha! The wooin o't!

Time and chance are but a tide  
Ha! Ha! The wooin o't!  
Slighted love is sair tae bide  
Ha! Ha! The wooin o't  
"Shall I like a fool?" quoth he,  
"For a haughty hizzie dee?  
She may gae tae France for me!"  
Ha! Ha! The wooin o't!

How it comes let doctors tell  
Ha! Ha! The wooin o't!  
Meg grew sick as he grew hale  
Ha! Ha! The wooin o't!  
Somethin in her bosom wrings  
For relief a sigh she brings  
A n O her een they spak sic things  
Ha! Ha! The wooin o't!

Duncan wis a lad o Grace  
Ha! Ha! The wooin o't!  
Maggie's wis a piteous case  
Ha! Ha! The wooin o't!  
Duncan couldna be her deith  
Swellin pity smoor'd his wrath....  
Noo they're crouse an canty baith  
Ha! Ha! The wooin o't!